



02.05. 2024

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

**Napparsimasut illersuisuannik pilersitsinissamut Inatsisissatut siunnersuuteqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Siumut gruppi)

Siullermi Siumut gruppiata siunnersuutaanut Naleraq qujajumavoq. Imatutllu Naleqqamiit oqaaseqarumavugut.

Siunnersuuteqartut siunnersuumminni tungavilersuutaat paatsuugassanngittumik paasinarput taama siunnersuuteqarsimammata. Tassami ullutsinni piviusut taamaapput, piffissaq sivikitsukuutaarlugu inuit oqallittarfiisigut siaruaanneqartarput nappaammik nalaattaqarlutik imaluunniit ilaqutaasunik nappaammik eqqugaasunik artorsafimminni aningaasatigut ikioqqusut. Nappaammik eqqugaasooq eqqugaasulluunniip ilaqutai ikioqqunissaminnik qanoq iliornissami nalornisarput, tassami nappaat sukkulluunniit ilimanginngilluinnakkatsinni tupannaannartumik takkuteriataartarpoq imaluunniit ersiutit takkuteriataarsinnaasarlutik, nappaataannaanngillat aamma inuunermi arlaatigut ajutoorsimallutik inuunermi navianartorsiorfimmiittut ilanngullugit eqqarsaatigisariaqarput aamma taakku eqqugaasarmata ulluinnaat ingerlanerit taakkununga aamma allanngorluinnartarput pisariaqartitsilersinnaasarlutillu

Eqqugaasooq ilaqutaalu soorunami tupaqqallutillu inuunermi qimagaanissamut ernumaneq, ersineq, sinissaarunneq, annilaanganeq, ernumaneq, toqu eqqarsaatiginera, eqqarsaaterpassuillu allat annertuumik misigisaraat tusartuarpagut. Sunut tamanut nukissaarunneq annertoq misigineqartarpoq katsorsartinnissaq kisiat eqqarsaatigineqalertoortarluni aamma nappaammik eqqugaasup ilaqutaasa qimakkusukkunnaartarpoq aammami paasinarujussuarpoq taama inissitarneq pisarmat. Taamaalillutik kingorna akiligassanut, nerisassanut, ineqarnernut akiligassanut aningaasanik atorsaleraangami nappaammi eqqugaanermi kingorna suut



periarfissaanersut, saaffiginniffissat kikkunersut nalornissutigineqalertarput kiisalu qanoq iliornissami ikiortissaarunneq misigisarlugu.

Siunnersuuteqartut napparsimasut oqaaseqartartussaannik pisariaqartitsineq eqqaavaat tassungalu tunngavilersuutaat paasinarluinnarput ullutsinnimi tassunga killissimavugut allaat tamakkununga pisariaqartitsinerput qaqilerneqartalerluni,

Naalackersuisut siunnersuummut akissutaat ima paasivara, paatsoorsimangikkuma aqqissuussaannermut pilersinneqareersumut suliami ingerlalertussami napparsimasut paasinarnerusumik oqinnerusumilu saaffiginnittalernissaanut aqqissuussamik qitiutinneqassasut, taamaammat Naalackersuisut oqariartuutaat ima paasivara: siunnersuuteqartut siunnersuutaata imarisaani naakkartorneqartut peqqinnissaq pillugu ataatsimiititaliarsuup innersuusutai naapertorlugit suliami aallartitsisoqareersimasoq, taamaalilluni napparsimasut illersuata suliasarigaluit siunnersuummi taaneqartut piareersarlugu suliarineqalersimallutik. Taava Napparsimasut illersuisuata suut suliarilissavai apeqqutaatinneqarpalulerpoq, taamaammat suli napparsimasut illersuisuannik pilersitsinissaq Naalackersuiniit pingaartinneqarpalummat, taamaalillutik allannguutissatut siunnersuuteqarput upernaakkut 2025 sioqqullugu napparsimasut illersuisuata sunik suliaqarnissaa akisussaaffeqarnissaanullu tunngatillugu uagut Inatsisartut saqqummiusseqqullugit peqqussagigut.

Paasinarpoq taamatut peqqusimmata tassami pisariqarluinnarpoq napparsimasut illersuisoqarnissaa, taamaalillutik Kullorsuarmi Ittoqqortoormiunilu sineriammilumi nakorsaqanngittumiittuni nakorsassaaleqinerup piliaanik tusaaneqarnissartik annertuumik pisariqartittarpaat, amerluttut allatullu pisariaqartitsisut napparsimasut illersuianiit aqqutissiuunneqarlutik katsorsarneqartalersinnaaniassammata, Naleqamiillu qilanaarpugut Naalaackersuisut saqqummiussasaanut aamma isumalluarpugut peqqinnissaqarfiup pingaarnertut aqqissuussaanerata ilusissaata nutaap piareernissaanut.

Taama Naleqqamiit oqaaseqarluta Siumut gruppi siunnersuutaanut paasinnilluta, Naalackersuisut allannguutissatut siunnersuutaat taperserparput. Ataatsimiititaliamullu susasaqartumut tassa Ilaqutariinnermut Peqqissutimullu Ataatsimiititaliamut ingerlateqqillutigu. Qujanaq.